

續  
文  
獻  
通  
考

續文獻通考卷之七十二

皇明進士雲間王圻纂輯

節義考

孝子四

金元

孝釋附

皇明

金

陳顏汲縣人父光爲家奴誣告賊殺人繫獄不勝拷訊因自誣服顏詣郡請代父死郡守哀之不敢決適帥臣至郡以其狀白帥曰此真孝子也遂併釋之太宗天會七年詔旌其門閭

劉政洛州人性至孝母目喪明政旦夕餽之母忽能視後母有疾剖股肉啖之疾即愈詔旌其廬除太子掌飲丞劉瑜棣州人母喪不能具葬質其子以給喪事章宗明昌

三年詔賜粟帛復其身

溫石相州人幼孤八歲奉母居郡南後母以天年終石自穿土起墳既葬親舊勸令歸石曰營緝未就姑待之時石已骨立親舊恐其遂死固勸令歸石曰祥而歸未晚也竟至禪祔廬側設竈旦作粥一盂析爲三食之不復舉火負土累月鄉人願代之石稽顙謝曰非石願也垂老時享祭器必親滌年七十有一而卒

劉全武陟人性至孝金末河朔擾攘父源母崔氏俱爲北兵所掠父病卒母被鬻不知所往全就虜而去後三年以母故祝天竊身南遁尋訪于祁蠡之間數月果得母所在哀號祈請主家拒而弗許全行乞于市得金若干

贖之而復爲母子者三十餘年克盡孝敬

薛繼元字蔓卿河東人事母孝所居化之

元

詹士龍字雲卿固始人宋都統鈞之子元兵破鄂鈞歿士龍甫三歲董忠獻公獲之以見世祖嘆曰此忠臣子也汝善養之既長知非董出晝夜痛哭他日從獵澤沱懇求復姓忠獻戲曰原欲復爾姓乎試爲投石水中浮則爾從士龍祝天曰吾父有靈石當暫浮因以石投水中沉而復浮者數四忠獻愕然曰天也遂許之

廖人俊寧都人元初父死于寇母亦被虜人俊七歲與祖母居既長誓求父骨得于叢塚間又往北方求母聞在

滄州至則已死欲負骨歸葬異父弟不許遂刻母像而還合葬焉吳澄有文記其事

王閏東平須城人事父甚孝父嘗卧疾夜失火不得出閏突入解衣蒙父抱而出之肌體灼爛父無少傷中統二年復其役

郭道鄉閩人義重五世孫至元初閩盜起與弟佐卿守孝子祠不去被執兄弟各求代死賊感而釋之子廷偉爲建寧路平準庫使辭歸侍養道卿嘗病疝危甚廷偉憂悴扶護一夕髮盡白有司言狀旌之

周古象蘄水人元初兵虜至蘄贅蒙古氏旣生子未嘗喜妻詢其故曰有母在欲得歸省妻許之且囑曰母在當

奉養勿以妾故復來及歸母尚無恙古象奉養盡孝母  
歿廬墓妻亦終身不嫁淮西憲僉韓克莊爲立孝里門  
蕭道壽興平人家貧鬻鍼自給母年八十餘奉養盡禮每  
旦夫婦親自盥櫛母食然後退就食母寢然後退就寢  
出入必告母怒欲笞之道壽自進枕伏地而受起則再  
拜違教母疾剗股肉啖之而愈至元八年朝命賜羊酒  
表其門

郭狗狗平陽翼城人父寧爲欽察先鋒使首領官戍大梁  
平宋將史太尉來攻寧全家被俘史將殺寧狗狗年五  
歲告史曰勿殺我父寧殺我史驚問知其歲曰五歲兒  
能爲是言吾當全汝家即以騎送寧等往合州道遇國

兵騎驚散寧家俱得還事聞旌之

周良佐唐山人事親孝親歿廬墓三年至元間旌表其門  
孔全鹿邑人父成病全割股肉啖之即愈後卒居喪盡哀  
廬于墓側負土爲墳日六十肩風雨有虧俟霽則補之  
三年起墳廣一畝高三丈餘至元間詔旌其門

田改住汶上人父病不能愈禱于天去衣卧冰上一月同  
縣王佳兒母病卧冰上半月

孟君用臨川人至元間兵掠臨川君用生三歲母被驅不  
知所往後求得之則已歿矣請喪歸葬不從乃號慟墓  
下得其遺衣杯棬以還而喪祭焉

甯猪狗山丹州人母七十餘患瘋疾藥餌不効猪狗割股

肉進啖遂愈歲餘復作不能行猪狗手滌溷穢護視甚周造版輿載母夫婦共舁行園田以娛之後卒居喪盡禮鄉里稱焉

李家奴潭州萬戶移刺瓊子也母病醫不可治割股肉和糜以進病乃痊撫州路總管管如林渾州民朱天祥並以母疾割股旌其家

畢也速忒立迷裏氏秦州人父喪廬墓次晝夜悲號有飛鳥翔集墳土湧起

尹夢龍中興人母喪負土爲墳結廬居其側手書孝經千餘卷散鄉人讀之有群鳥集其塚樹

胡景清龍溪人元兵下漳南景清甫五歲隨父母逃難倉



卒失其母景清長知學每念母輒涕下一日辭其父抵幽薊覓之于燕市遇其叔胡巨川知母已至燕而未知其處踰年始得之蓋母子不相見者四十年矣事聞詔旌表之仍給驛以歸

陳譽字譽夫福清人性孝友至元中母林氏病譽割股肉療之子觀泗字友達亦篤孝父母疾俱嘗割股肉和粥以進

張鏈下蔡人事母至孝母卒居廬三年致有紅蓮變白之異郡立孝蓮坊事聞大德二年旌表

陳韶孫廣川番禺人父瀏以罪流肇州韶孫年十歲朝夕號泣願從遂與俱徃道過遼陽平章塔出見而憫焉曰

吾返汝故鄉汝願之乎韶孫曰旣不能以身代父當死  
生以之歸非所願也大德六年父死韶孫哀慟見者爲  
之泣下肇州萬戶以聞命遣還里仍旌異之

張子夔安西人父喪每夜半以背負土肘膝行地匍匐至  
葬所飾細土爲墳

李忠晉寧人幼孤事父至孝大德七年地震山移民居皆  
摧壓將近忠家分爲二行五十餘步復合

吳國賓雷州人父喪廬墓大德八年境內蝗害稼惟國賓  
田無損

章卿孫蜀人本劉氏幼爲章提刑養子與母富氏相失三  
十八年遍訪于江西諸郡迎歸養之旌其家

李鵬飛池州人生母姚氏爲嫡母不容改嫁爲朱氏妻鵬飛幼不知也年十九思慕哀痛學醫濟人祈早見母行求三歲至蘄州羅田縣得焉時朱氏家方疫鵬飛起之遂迎還養父之復歸朱氏時渡江省覲旣卒歲時携子孫徃祭墓終其身事聞旌其家

徹徹祖思古氏幼喪父事母篤孝稍壯母沒慟哭頓絕水漿不入口者三日旣葬居喪有禮年四十餘思慕如童孩每見人父母則嗚咽流涕曰人皆有父母我獨無至大三年褒異

王初應漳州長泰人至大四年從父義士樵劉嶺山虎搏父傷右肩初應抽鑱刀刺虎鼻殺之父得生同縣施合

丁文忠鄆城人業鼓冶母和氏疾與弟文孝竭力調侍母卒文忠廬墓側不與妻面者三年父貴又病醫不能療文忠造車一輛兄弟共御之載父禱于嵩山五臺泰安河瀆諸祠遇異僧遺藥而愈延祐七年旌之

邵敬祖宛丘人父歿廬墓母繼歿河決不克葬殯于城西敬祖露宿依其側風雨不去友人哀之爲縛草舍庇之前後居廬六年兩髀俱成濕疾至治三年旌其家越楓橋里人丁氏母雙目失明丁至孝每朝盥漱訖即舐母之目積有年矣俄而母左目明未久右目復明憲司上其事于朝表其閭曰孝子之門蓋至治年間也

黃覺經南城人五歲失母稍長誓天誦佛書願求母所在

乃渡江涉淮行乞而往衝風冒雨備嘗艱險三十八年得之梁縣至治中旌表其門

尹華洧川人至治初遊學于京師忽慶母疾心怪之馳歸母已亡居廬蔬食哀毀骨立每雞鳴起手治祭饌詣墓所哭奠雖風雪不廢父輔臣嘗病瘵華侍湯藥衣不解帶夜則禱于天願死以代父命數日疾愈鄉里嗟異之孫希賢高唐人母病痢方書曰血溫身熱者死希賢嘗之其血溫乃號泣祈天求代母遂愈

十勝榮高郵人母痢不能藥日嘗糞以求愈兄疾禮北辰乞減已年延之並痊

宗祀大都人年十九父內宰卒擗踊號泣絕而復生過哀

成疾卧床榻猶哭不止淚盡繼以血疾轉甚囑其妻楊氏善守志以事繼母遂卒楊氏遺腹生一男人稱孝感  
泰定三年旌

高可燾有孝行文宗二年旌其門

張聚新鄉人性至孝天曆間母卒廬于墓側三年朝夕負  
土成墳有司以聞詔旌其門

五庸字伯常雄州歸信人母李氏疾祈北辰叩頭出血母  
疾遂愈及母卒哀毀幾絕露處墓前旦夕悲號一夕雷  
雨暴至鄉人持寢席欲蔽之見庸坐卧之地獨不沾濕  
嘆異而去復有蜜蜂數十房來止其家歲得蜜蠟以供  
祭祀

黃贊字止敬臨江人父君道延祐間求官京師留贊江南及長聞父娶後妻居永平乃往省之則父沒已三年矣庶母聞贊來盡挾其貲更嫁拒不見贊贊號泣思得父柩歸殮欲庶母指示亟裹糧往叩庶母復拒之三日不納庶母弟憐之與偕至永平屬縣樂亭求父墓又弗得贊哭禱于神夢老父以杖指葬處曰見片磚即可得明日就其地求之庶母之弟曰真是已殮時有某物可驗啓朽棺得父骨以歸

何從義延安洛川人祖良祖母李氏偕亡從義廬墓側旦夕哀慕不脫經帶不食菜果事父世榮母王氏孝養尤至伯祖溫叔祖恭讓叔父玠皆無子咸爲治葬築高墳

祭奠以禮人義之

哈都赤大都固安州人母疾不痊礪所佩小刀割開左臂取肉一片進母母曰此何肉其甘如是數日病痊

高必達建昌人五歲時父明大棄家遠遊莫知所適必達既長晝夜哀慕乃娶妻養母而身往四方求其父十餘年不得心愈悲忽傳黃州全真道院有虛明子學道三十年矣本建昌人姓高氏必達詢知爲父即往叩頭不已虛明瞑坐不顧久之斥曰我非汝父汝亟去必達留侍左右不少懈辭氣哀惻其徒謂虛明曰師有子如此可勿歸乎不得已還家必達孝養篤至鄉里稱之

魯德漁陽人魯子裔也母早亡父仲祥再繼左氏樂襄陽



風土同往居焉亂兵陷襄陽遂失左氏德邇來五年得于廣海間迎歸孝養備至詔旌其門

靳曷字克昌曲沃人兄榮爲奎章學士奉母王氏官于朝母歿曷與兄榮護喪還家至平定大雷雨流水驟至曷伏柩上榮呼之避水曷不忍舍遂爲水漂沒後得王氏柩于三里外得曷屍于五里外詔賜孝子碑

張恭偃師人以兵部符署鷹房府案牘親老辭歸侍養父喪過哀奉母馮氏尤謹歲凶恭夫婦採野蔬爲食而營奉甘旨無乏母病恭手除溷穢喂哺飲食且嘗糞驗疾勢天曆初西兵至河南居民悉竄恭視母病項中一劒不去母驚悸而歿恭居喪盡禮人稱孝焉詔旌其門

孫瑾丹徒人父喪哀毀踰禮葬時載柩渡江潮波方湧俄  
順風張帆如履平地繼母唐氏患癰親吮之又喪目祇  
之復明唐氏卒卜日將葬天雨不止瑾號天乞霽至期  
開朗甫掩壙復兩詔旌其孝

吳希魯睢寧人父卒葬之日大雨希魯跪柩前炷艾燃腕  
火熾雨止既葬廬墓左詔旌之

龐遵永年人文宗至順間母病腫三年不能起忽思食鯉  
魚遵求於市不得求漁者又不得歸塗嘆恨忽有鯉躍  
入其舟遵作羹以獻母病即瘥

鮑壽孫歙人至元丙子盜起與父皆被獲父子爭相代死  
賊哀之忽大風起叢林間賊疑兵至駭散父子俱免人

稱爲慈孝

繆倫字叔彝東平人侍父宦遊寓居錢塘至正十六年淮兵寇城執其父將殺之倫哀號乞免弗聽傾家貲以贖又弗聽乃自縛請代于是殺倫而釋其父

陳道邵武人至正七年群虎晝傷人一日道父樵爲虎所噬道以柴擔脅前縱擊虎舍其父遂噬道啖盡鄉人爲殮其父屍葬之

張紹祖潁川人以孝聞至正中奉父避兵山間賊至將殺其父紹祖泣曰吾父行善請即殺我以代父且君等非父母所生乎何忍害人父賊以戈擊之戈隨挫因相謂曰此真孝子也釋之

史彥斌邳州人有孝行至正十四年河溢金鄉魚臺水漂  
母柩彥斌縛草爲人置水中仰天呼曰假此靈芻指示  
母棺經十餘日果得于桑林中復葬之

李明德上高人孝行純篤至正中兵陷泰州因掠上高劫  
其父欲殺之明德泣告曰子豈不能代父乎兵遂殺明  
德免其父

張琦岳州臨湘人生二歲而母劉氏遭亂陷于兵琦思母  
不置嘆曰人皆有母我獨無輒泣下及冠請于父往求  
其母數歲不得後得于池州之貴池迎以歸養其後十  
五年而父歿又三年而母歿終喪猶蔬食表門曰孝義  
姜蕪嚴州淳安人幼孤與二兄養母至孝母死哀慕幾絕

既葬獨居墓下朝夕哭奠荒山中躬自樵爨蔬食飲水  
一衰麻寒暑不易同里陳氏戴氏子不能事其父母感  
兼行慙悔皆迎養焉

劉思敬延安宜君人孝養繼母沙氏杜氏無異已母父年  
八十兩目俱喪亂兵剽掠負父避岩穴中有兵至欲殺  
思敬思敬泣言曰父老矣又無目我死不足惜使我父  
何依乎兵憐其孝父子皆免于難

朱仁靖安人至正間母劉氏病篤割肝取股救母得活立  
旌孝坊表之

過宗一海鹽人早喪父獨與母居至正間張士誠隔姑蘇  
畧地至海上宗一負母逃與寇遇欲殺之以身蔽母中

數鎗賊舍而去既返益困傭以給食母卒六年不克葬  
寢苦服衰蔬食不變語輒泣下白燕巢其室東西相向  
及葬燕不復至

呂祐晉江人至正末郡城破有卒拔刃脅其母索財不得  
欲斫其母祐奪其刃手指盡裂仆地良久而甦開目視  
之曰母幸無恙殺死無憾遂瞑目死

秦十一輝縣人早孤養母劉氏元末兵至母目失明十一  
負母携妻子避兵于山時子方三歲母得食嘗哺之十  
一謀于妻曰今兵荒缺食母餐不飽莫若棄其兒幸得  
母全兒不足惜妻從之遂棄兒負母避處險阻採食爲  
養事定乃歸

孫抑字希武晉寧洪洞縣人有孝性開保之變有亂兵剽掠拔白刃嚇抑母求財不得舉刃欲斫之抑亟以身蔽母請代受斫母乃得免父爲所虜不知所向或語之曰被驅而東矣東軍得所掠民皆殺之汝慎無就死抑曰吾可畏死而棄吾父乎遂往出入死地屢瀕危殆卒得父以歸

石永壽新昌人性淳厚事親至孝元末兵亂其父謙孫年老被執兵欲殺之永壽亟抱父請代兵遂殺永壽其父獲免鄉人哀之

趙應祥廬陵人性至孝年十四其父行賈不還年二十六因從父從北來知父已死而不知其處日夜哀號即辭

母往求聞都下有曾老者與父善走數千里詢之知父死濱州利津縣又走利津得朱琪張文者言若父吾所葬棺具有題識在城南門外第歲久墓塚纍纍不可辨識矣應祥行哭七日求不得即解髮繫馬鞍祝曰隨馬所之過吾父墳者當髮解鞍墮旣經一墳髮解鞍隨發之棺上具有父姓名遂獲歸骨人以爲孝感

周樂温州瑞安人父日成海賊據温州拘日成置海舟上樂隨往事其父甚謹一日賊酋沉日成於水樂哭請曰有祖母幸留父侍養願以身代父死不聽樂抱父不捨遂同死焉

郭通徐州人少以孝稱父柩在殯隣火延及通舍通仰天



訴曰柩不能移寧與柩俱焚死伏柩痛哭火須臾遂息  
俛文質字孟彬十歲割股以療母疾

黃一清休寧人少孤吳氏守節卧病醫欲得蜜乃夜乞諸  
隣遇虎一清號曰死不足惜如母何虎熟視而去人謂  
孝感之應

楊明性至孝父秀病適隆冬明冒雪跪行禱祝神水飲之  
病愈母張氏卒廬于墓側鄉黨稱其孝

楊皞扶風人父清母牛氏嘗病劇皞叩天求代遂痊如是  
者再牛氏歿哀毀特甚葬之日大雨獨皞墓前後數百  
步密雲蔽之旣葬廬墓負土爲墳蔬食飲水終其喪父  
卒亦如之

趙榮扶風人母強氏有疾割股肉啖者三後卒痛哭不食三日方飲水七月乃食粥葬之日白雲蔽其墓前後十五里負土成墳廬其側終喪

王克已延安中部人父伯通歿克已負土築墳廬于墓側貊高縱兵暴掠民皆逃竄克已獨守墓不去家人呼之避兵克已曰吾誓守墓三年以報吾親雖死不可棄也俄而兵至見其身衣衰經形容憔悴曰此孝子也遂不忍害

張茂濱州人母王氏病不愈剖右脅出肝假湯餌以進病即愈人以爲孝感

鮑興字雄飛鄒平人事父母孝母疾罄資求醫母喪三年

不入私室復慮父缺侍置大樓舡共載隨遇爲家浮游  
江河以娛其志

張緝字士明膠州人性篤孝後遭賊突入卧內欲刃其母  
緝以身蔽中脇下三日而死

陶忱仲台之臨海人少失母繼母弗之愛及長娶吳氏繼  
母不能容乃出居外後父年老家又匱迎父繼母養之  
更爲繼母弟娶婦嫁其妹子凱亦有孝友之行

祝大朋字公亮麗水人事母呂氏孝母卒刻木爲像事之  
如平生

白珽樵李人性至孝嘗患奇病刲股和藥而進病遂愈  
董茂春莊愍之子事母至孝飲食寒煖未嘗一日少離母

疾輒籲天願以身代

趙和母遭兵被虜年十四思之不寘籲天至遼東尋獲母  
被得者留不遣和具奏乃得與母俱還

林逸字國安自號愚愚龍溪人早喪父獨奉母以居一兄  
贅居桐城逸欲貽書請其兄及嫂氏同居以養母妻楊  
氏不聽乃自搥以感動之甚至對案不食者累日楊氏  
化而順從及兄嫂歸逸事之甚謹私房不蓄一錢

陶煜字明元用道家法事玄武神甚謹母病心痛歲瀕死  
者六七發醫莫能愈明元每搥心嚼舌以代母痛一日  
危甚計無所出走禱玄武前曰刳股割肝非先王禮在  
法當禁某非不知也今事急失敢犯死取一臂爲湯劑

神爾有靈病庶其瘳禱畢引刀欲下忽有二童自外躍入叱曰毋自損我天醫也明元大駭伏地乞哀童子取案上筆書數字于几面擲筆二童子咸仆地隨呼家人救之嚙以水良久蘇乃鄰家兒叩之無所知視其書藥方也隨讀隨隱明元私喜曰此必玄武神也吾母其瘳矣即如方治之藥甫及口而痛以失終母身不再舉張旺舅霍丘人幼失父母陳氏居貧守志旺舅九歲賣餚以養及長母病醫藥無資惟日夜哭痛祈天求代未幾遂愈又自以生業微不能多給遂不娶以終母年縣令言于朝旌之

郭固邵武人性至孝家貧竭力養親母年九十八卒傭身

以葬每且詣墓哭祭如是者十有四年守臣以聞詔旌異之

楊惠父早卒事母劉氏盡孝母疾求以身代母忽夢神告之曰爾疾當終爲爾子誠孝所感今特延之疾果瘳母歿廬墓哀毀喪明有司以聞旌表其門仍蠲其徭役

吳大中天性孝敬父七十二寢疾衣不解帶父歿泣血幾絕旣葬奉母陳氏廬于墓側十有七年母年踰九十而卒居喪哀痛逾昔有司以孝聞上旌其門曰吳氏孝子袁知周泰州人父敬夫塩丁爲總催虐死知周誓復仇寢苦枕塊陰佩刀伺間者六年後仇爲他人所殺乃以刀棄之郊事聞詔旌之

李仲叔新淦人幼孤事二母俱孝一日母病思橘仲叔求橘以食之遺核床下生而漸長仲叔撤屋成之有司以其事聞召爲贛州巡檢

趙孟玖母徐氏病割股和藥以進病愈旌表其門曰篤孝劉從竹字友直福清人事母孝母終廬于墓俄所居門楣及墓前之石皆有芝產

李奉先葉縣人性至孝父卒旣葬竊自嘆曰奉先兒時父嘗戒家人兒幼勿令獨入林野恐其驚恐今親歿一旦棄于林野安所忍乎乃結庵于墓側晝夜臨哭其中植楸數百株時呼爲孝子林

劉源中年人母吳氏年七十餘病甚不能行適兵火起且

延至其家隣里俱逃源力不能救乃呼天號泣趨入抱母爲火所焚而死

梁琮安陽人父卒廬墓負土爲墳朝饘暮粥若將終身從子鐸父喪廬墓與弟五人同居無間言時同邑趙信皇甫達皆以孝聞居喪廬墓達念母老無棺一日大雨漂巨木至門視之良材也後遂取以殮母云

顏應祐同安人母許氏先以患難遷徙失所之母子不相知者二十六年應祐訪求不得常悲號流涕一日得書知在滇南即往求之果得母遠迎以歸士君子咸歌詩以嘉其孝

彭季世江州人爲義門陳氏之傭父喪明已久有子一人



嘗聞陳之子弟言舜爲父瞽瞍舐目而致明乃歸効之  
不旬日父目忽然明朗

杜祐下邳人爲河南水馬站提領父病於家祐忽心驚流  
汗即棄職歸父病始三日遂禱求代且嘗糞以驗病父  
卒廬墓有馴兔之瑞

郭全遼陽人幼喪母哀戚如成人及壯父庭玉又卒居廬  
三載啜粥面墨事繼母唐古氏甚孝唐古氏生四子皆  
幼全躬耕以養旣長娶婦各求分財全不能止凡田廬  
器物悉取朽弊者奉唐古氏甘旨無乏唐古氏卒全年  
六十餘哀毀廬墓終喪披旌

王薦福寧人性孝而好義父嘗病甚薦夜禱於天願減已

年益父壽父絕而復甦告其友曰適有神人黃衣帕首  
恍惚語我曰汝子孝上帝命錫汝十齡病遽愈母沈氏  
病渴語薦曰得瓜以啖渴可止時冬月求之不得行至  
深奧頗值雪避楸下忽見巖石間青蔓離披有二瓜焉  
因摘歸奉母母渴頃止

李原禮性最孝親終廬墓不食鹽醬其子立與曾孫廷春  
居父母喪並如之立飭母瞽目復明人謂一門純孝  
楊汝義昆明人仕爲騰衝府同知事親至孝親歿負土成  
墳詔旌其門

馬伯傑山東鄒縣人父拜江南行臺監察御史不以家行  
傑獨與母居盜起汝穎轉畧齊魯境傑負母匿草間母

死倉卒不能具棺殮聚石葬郛地西盜入郛城傑伏于墓上衆欲驅而前脅以白刃傑大慟曰母在此母在此盜曰此孝子也乃舍之復送以衣糧旣而邑剝于兵失墓所在求之二年得于榛莽中故衣尚存始克遷祔祖塋御史轉浙西憲僉督江南者八年遂冒鋒鏑間關數千里省之錢塘人咸稱爲馬孝子云

石明三餘姚人家貧喪父獨與母居山中一日明三自外歸覓母不見見壁穿而卧內有三虎子知母爲虎所害乃盡殺虎子礪巨斧伺母虎至斫其腦裂而死復往巖石斫殺牡虎明三亦立死不仆張目如生所執斧牢不可拔

祝公榮字大昌麗水人養親甚孝母歿居喪盡禮家人失火公榮力不能救乃伏棺悲哭其火自滅鄉里異之塑二親像於堂朝夕事之如生焉

陸思孝山陰樵者性至孝母老病痢醫禱久不効思孝方欲刲股肉爲糜以進忽夢寐間恍若有神人者授以方藥思孝得而異之即以奉母其疾遂愈

夏永慶字章甫定海人大德中侍父文德轉粟京師浮海而北舟抵海洋鎮時易一小舟盤載喧呼雜揉文德顛仆溺水永慶震駭號天沒入洪濤載父出波面舵工提戟鉤其衣父賴不死永慶力不支竟沉其後諸弟傷之皆以孝義維其家居同室食同爨至正十三年表曰孝

義之門

馬英河內人性孝友父喪哀毀二兄繼沒獨事母并奉二寡嫂與居比母喪卜地葬諸喪親負土爲四墳手植松栢廬于墓側終其身

武德政真定人事母蘇氏至孝母死時天大旱方掘地求水忽二蛇躍出一東一西隨其地掘之果得泉事聞旌復其家

唐韓唐轂鄆人父復禮以擅匿官離事被陷且拘以歸于京轅詣吏代父命不省乃叩頭流血繼之以死吏憫其情脫父桎而桎之行至越州時轂自杭回遇諸途挽轅衣袂哭曰兄爲冢子宗祀所托不可以死弟請代兄行

轅不從轂給之曰兄訥于言徃必不免弟有一計可生  
幸無苦竟奪其械加已手吏亦閱而從之轂抵京係獄  
旬日迨臣奏其非罪得免

馬安父喪膝行負土成墳廬于側號泣三年有司以聞旌  
表其門

杜世壽母劉氏病篤刲股煮粥以進母病遂愈事聞詔旌  
其門曰純孝

段德隆寧晉人事父母孝母歿廬墓二千石聞于朝命復  
其家

王忠三原長孫里人能盡孝道值母有疾欲爲之娶忠曰  
吾母疾安忍爲此後母卒廬墓日夜號哭䟽食飲水人

所不堪有司奏旌其門

許敬觀明州衛兵事母至孝一日拉十兵駕舟販鹽至郡江北渡忽暴風電掣霹靂挈舟人上泥塗衆皆震死時敬觀昏絕默念我死母將誰依如有人援之去死所三丈許而甦雷火燎髮如禿人以爲孝行之報

鄭覺民字以道鄞人母嘗患目日以舌舐之即愈後病痲衣不解帶父當葬適病瘡甚劇人止其臨壙泣日幸從先人訖大事即道死無憾旣還而瘡

葉志道德興人事母至孝母歿廬墓側有馴虎鳥巢之異事聞旌表其門

段文瑞雲南河陽人讀書奉母盡孝母卒以手履地行一

里外送母喪事聞旌表曰孝義之門

湯霖新建人早孤事母孝母病熱思米時天煥霖累日號泣地上忽聞池中潺潺聲視之乃米也取以奉母遂愈郡守以聞嘉其孝行授臨江路儒學教授

王士弘中部縣人父搏有疾傾家資求醫即拜徧禱諸神叩額成瘡父歿哀毀廬墓三年有奇鵲來巢飛鳥翔集之異終喪復建祠于塋朔望必往奠祭風雨不廢事聞旌表其閭

劉通亳州譙人家貧業農母卜氏目失明通誓斷酒肉祈禱三十年不懈卜氏年八十五目復明事聞褒美之

黃道賢字君典晉江人事母唐氏以孝行稱有司聞于朝



榜其門曰旌孝坊

胡光遠太平人母喪廬墓一夕夢母欲食魚晨起號天將求魚以祭忽見生魚五尾列墓前俱有齧痕隣里驚異聚觀有獺出池草中浮水去衆知獺所獻狀聞表其閭胡伴侶密縣人其父實嘗患心疾數月幾死更數醫俱莫能療侶乃齋沐焚香泣告于天以所佩小刀于右脇旁割其皮膚割脂一片煎藥以進父疾遂瘳其傷亦旋愈朝廷旌其門

陳乞兒夏邑人年九歲喪母哀毀負土爲墳高一丈廣十六步人憫其幼欲助之乞兒泣拜而辭有司以聞特表異之

馬仲擲安陽人性至孝每定省必得親悅方休父母卒結廬墓側詔旌其家

王慶新鄉人幼孤事母克孝母病慶禱于天地願以身代母病遂愈朝夕奉甘旨二十餘年未嘗少怠鄉里化之有司以聞詔蠲其家

徐丙瑞安人幼喪母泣血成疾父亡不忍葬結廬古山下殯其中閉戶守視有牧童遺火延殯廬丙與子慈亟撲不止欲投身火中與樞俱焚俄暴雨火滅

耿昌獲嘉人少有志家貧養親竭力以供甘旨父亡廬于墓側三年有司以聞旌表其門

李全獲嘉人王節婦之子年十歲喪父家貧甚躬耕以養

母者四十年一日母疾藥不可療全額天祈以身代割  
股作羹以啖母母尋愈後母卒全哀毀骨立廬墓三年  
總管奏聞詔旌其門閭

戚故嘉興人事母至孝居喪哀毀過禮旣葬廬墓有白芝  
之瑞又以木刻母像事之如生邦人稱之

蕭珣字公璲武陟人父母相繼而卒先後皆廬于墓側哀  
慟無已凡二年竟以羸憊而卒部使者上其事特加旌  
表

王思聰延安塞人素力田農隙則教諸生得束修以養親  
母喪盡哀事繼母如所生以家多幼穉侵父食別築室  
曰養老室奉之朝夕定省愈久不怠父嘗病劇思聰拜

祈於天額膝皆成瘡得神泉飲之愈後復失明思聰祇之即能視縣上狀命表異之

徐鈺鎮江人始冠侍父鎮將之婺源父失足墮水中鈺投溪擁鎮出鈺力困憊遂溺死江浙行省言狀詔旌異之趙天爵字伯廉平陽解州夏縣人母喪廬墓三年父繼喪又如之惟蔬食菜羹不飲酒食肉不與妻妾見有司聞于親族表門閭復其身

陳汝楫字傳巖象山人父宋助教應魁母楊氏汝楫事親至孝親沒未葬隣家失火延及楫室楫與妻徐氏伏柩哀慟誓不獨存風反火息柩獲存人以爲孝感

華昭勤人生未晬父亡母沈氏家貧不能自有父母欲奪

其志誓死不從後疾亟昭尚幼刻意茹素禱之弗痊乃  
露禱于天刲左股作糜以進母愈至正十年尹許廣大  
書節孝字表其門

臨江劉良臣

汴梁陳善

同官強安

瀋州高守質

安豐高澤

鞏昌王欽

修武員思忠

榆縣王士寧

河南朱友諒

泉州葉森

寧陵呂德

汲縣劉洪

建昌鄭佛生

棠邑張復亨

保定邢政

寧夏趙那海

臨潼任居敬

隴西周慶徐德興

真定張慶

汝慶李從善

華州要敬

色目氏沙的

晉江黃道賢

樂安許正臣

安平李思敬

羅田吳大中

以上皆事親篤孝實跡未詳者

太原王構

萊州任梓

平灤王振

北京張洪範

登封王佐

下蔡許從政

富平王賈僧

鄭州段好仁趙壁薛明善張齊

汴梁韓榮劉斌張裕何泰史恪高成鄧孝祖李文淵杜天

麟張顯祖

涇陽張國祥

延安王旻

東昌張翬

永平梁訥

高堂鄭榮劉居敬

同州趙良

南陽周郁陳仁劉權李廷瑞怯烈友

大同高著

江都毛翔

汲縣徐昌祖

歸德葛祥張德成張遜王珪劉弼

真定宋貞王世賢

晉寧史貴

保定耿德溫張行一賈秉實張鼎

河南王宗道孫裔

夾谷天祐

趙州趙德隆

安豐王德新石思讓

翼寧王溥

大都王麟李簡

華陰李寧屈秀

懷慶侯榮丁用郭天一

耀州王思

中牟閻讓

曹州鄧淵呂政

徐州胡居仁張允中

衛輝王慶

福建朱虞龍

隨州高可燾

濟寧魏鐸

武康王子中

溫縣趙成

峨眉鄭國安

息州移刺伯顏

淮安穆謨

汶上趙恒



潁城許時中

衡山歐陽誠復

江陵穆堅

薊州王欽

定陶元顥祖

絳州姚好智

宿州孫克忠

集慶傅霖

濟南宋懷忠牟克孝

汝寧張都

泉州黃道賢

谷城王福

解州靖與魯張琮

般陽戴貞

兗州王治

沔陽徐勝祖

興中石秣昌齡

峽州秦桂華

莘縣王德新

蒙古色目氏納魯赤丁思馬改住阿合馬拜住木八刺

帖木兒瑣住唐兀及晏只哥李朶羅及塔塔思及

以上皆居喪廬墓嘗表其間或復其家

孝釋附

道丕性至孝遭時擾亂自擔負其母避於華陰山中自乞食以爲養其父亦以行役歿於事道丕往其死處求遺骨亂骸莫辨道丕泣禱忽有髑髏躍而前因得父骨以歸人皆謂孝感

張策後梁時少爲僧居雍之慈恩精廬廣明末盜犯關策遂反初服奉父母逃難及丁父艱以孝聞太祖聞而嘉之奏爲鄭滑支使

應天寺僧失其名幼貧無以養母剃髮乞食以給母年一

百五歲而終

紹清禪師居潭州興化寺乃南嶽下十二世法嗣也常爲母說法以報劬勞

皇明

宗室通山王華侯父故哭臨至死萬曆中巡撫郭惟賢奏其孝行恩賜表揚扁名旌孝

原武王朝倫係周府下郡王萬曆二十六年以禮部覆請旌獎孝行

古朴國子生洪武丁卯春三月除爲兵部主事先是朴奏言家貧母老願仕異祿養母太祖嘉其志遂除是職朴得迎養京師

陳興故元鎮撫洪武三年庚戌放歸嵩州養母仍賜白金衣帽先是上遊後苑偶見巢鵲卵翼之勞嘆曰禽鳥劬勞若是況人母子之情乎下令群臣有親老願歸養者聽適興被俘來京因奏云有母在嵩州年八十餘乞歸養上即許之興陛辭上顧謂侍臣曰陳興雖武夫聞朕言即愴然朕始不知其有母若知之肯令其離遠耶侍臣曰陛下以孝治天下無微不燭上曰人情莫不愛其親必使之得盡其孝一人孝而衆人皆趨於孝此風化之本也故聖王之於天下必本人情而爲治

江伯兒洪武時母疾割脇肉以食不愈禱於岱嶽願母病

愈則殺子以祭已而母愈遂殺其三歲子祭事聞 太  
祖怒曰父子天倫至重禮父爲長子三年服今百姓乃  
手殺其子絕滅倫理宜亟捕治之遂逮伯兒杖一百謫  
戍海南 命禮部詳議旌表孝行事例禮部議子之事  
親居則致其敬養則致其樂有疾則拜托良醫常進善  
藥至於呼天禱神此懇切之至情人子之心不容已者  
若卧冰割股前古所無事出後世亦是間見割肝之舉  
殘害爲最且如父母止有一子割股割肝或至喪生卧  
冰或至凍死使父母無依宗祀乏生豈不反爲大不孝  
乎原其所自愚昧之徒一時激發反務爲詭異之行以  
驚俗駭世希求旌表規避徭役割股不已至於割肝割

肝不已至於殺子遠道傷生莫此爲甚自今人子遇父  
母病醫治弗愈無所控訴不得已而卧冰割股亦聽其  
爲惟不在於旌表之例從之

北直隸

崔克昇內黃人幼以孝聞父遭疾醫弗能療昇取父大小  
便嘗之以審輕重卒治得廖父年九十九卒昇跣足負  
土築墳廬墓三年有司上其事詔旌表

甘澤開州人與弟潤俱以純孝稱歷官御史廣西副使旣  
謫滁州天順初召還至張秋聞父喪徒跣三百餘里  
歸葬廬墓旦暮泣奠盡哀有鬼蛇馴擾墓傍弟潤事母  
亦篤孝俱詔旌表

侯英開州人與弟侃俱篤孝母病眼疾憂泣輟食每夜稽首祈祐疾竟愈歷官江西按察使聞訃奔還偕弟廬于墓有白鷺數千遶墓事聞旌表仕終河南都憲

王鵬東明人性孝友補邑庠生居喪執禮廬墓三年致平地湧泉事聞 詔旌表弘治壬子鄉薦歷官監察御史

### 浙江僉事

李得成涑水人母張氏避兵度不能脫自投于河後得成夢母在河冰下卧冰七日致河冰俱釋洪武中以孝薦舉授光祿寺署丞遷尚寶司丞永樂間歷陝西右布政使

顧仲禮保定人幼孤事母至孝遇歲凶負母就養他郡七

年始歸見蝗起食其田苗仲禮泣曰吾將何以為養乎  
俄疾風蝗盡去苗得不傷母卒廬墓三年哀慟如初喪  
洪武中事聞旌其門

邊靖慶都人由太學生爲廣寧經歷自幼以孝聞父友諒  
卒靖哀樹幾絕及葬負土成墓廬于側環植以桮歲旱  
不雨靖旦暮汲水灌之俄有泉湧出道傍足以灌漑人  
以爲孝感所致事聞 詔旌其門

史五常內黃人父萱洪武中任廣東按察司僉事卒於官  
五常始七歲母以幼子且無資不能歸葬遂即和光寺  
僧地權厝之携五常比返嘗諭之曰汝父棺中有大錢  
可驗待汝長成時尋骨歸葬則汝可報父恩而我亦盡



婦道矣後母歿五常年五十乃入廣求之既至不得旦  
次泣告於天里人哀之有爲進食者數日憲幕張珪知  
之爲白于臺馳簡巡司李斌多方物色果識其處啟之  
遺骸大錢猶在五常以禮歛襯當道爲給舟車路費歸  
葬五常仍廬墓側居三年正統間有司列狀聞 詔表  
其門

楊騰松北直隸遷安人以孝行隆慶四年旌

郝烈邯鄲人萬曆二十六年以子戶部主事郝大猷奏父  
烈孝行旌表如例

南直隸

范從文吳人仲淹之十三世孫文之六世祖柔食邑於甌

父爲吏潮州卒不能歸從文尚幼遂奔走求喪哀感道路初失所在偶遇天雨土墮乃露父柩遂啟之以歸人謂孝感所致洪武中以孝廉徵奉使不辱命擢御史改綜戶曹事奏貸株迭徙百餘人其僚嫉之中以法將伏鎧呼曰幸以議賢得百世宥上問而知爲仲淹後乃免之謫莊浪頃復追戍金齒未樂初復以薦召爲掌故歸年八十餘乃卒所論著甚衆

曹閔上海人舉進士授沙縣知縣性至孝正德初爲南臺御史上疏極論宦官竊弄下錦衣獄杖幾死瑾誅後官即引退養母十年母終枕塊得寒疾卒

錢敏舒城人幼喪父家貧力學事母至孝及中進士乞還

鄉侍母母患瘡侍湯藥頃不離側母歿廬墓 詔旌表  
高興合肥人性至孝父歿哀毀骨立廬墓三年歸有白鵲  
數百隨集于宅人以爲孝感事聞旌表

權謹徐州人十歲喪父哀毀幾絕洪武中以薦知樂安縣  
陞光祿署丞迎母祿養母疾籲天求以身代母年九十  
卒躬負土成墳廬墓三年哭泣不輟事聞 召拜文  
華殿大學士固辭 朝廷不允欲以風勵天下之爲人  
子者尋改通政司叅議致仕仍旌其門曰孝行  
王忠武進人洪武初父友諒以輸稅後期法當死忠時年  
十七即自詣京懇請代父比至會赦得免人以孝稱宣  
德中以國子生除兵部主事竟以母老乞致仕

杜瓊字用嘉吳人心趣貞澹篤孝淳德無慙古人生一月  
失父四歲記四言十歲通孝經論孟疏義成童人便師  
之教授甚廣嘗刲股愈母疾有司欲上其事瓊曰民爲  
此以母疾迫切何上爲君侯或以風教爲務彰表母節  
則大願耳守令感而從之得旌其門每遇詔詔求賢轍  
辭公薦居樂園里號東原生晚得鹿冠又云鹿冠道人  
爲文辭取達意不務纖麗有東原集紀善錄耕餘錄書  
體道婉丹青遠澹暮歲標致益高歸然典刑爲林壑之  
表年八十餘卒門人私謚淵孝先生

朱顯字景南長洲人父病不飲不葷不內處不解冠服蠶  
蝨滿襮積問卜迎醫俵俵奔市中若狂及死廬墓終喪

甲午下 詔旌之

金子安上海人事母孝母疾甚禱神願以身代母忽甦曰  
神語我加壽三十四矣後母歿月數如之人以爲孝感  
高承順華亭人性至孝母亡哀毀過禮父常疾劇且舟厄  
於風順哀禱獲免嘉靖壬子父遇倭迫之以兵順延頸  
請代倭兩釋之子振聲亦有至性人稱爲兩世孝子  
馮行可華亭人父恩官御史直言詔獄行可已登鄉試刺  
血上疏 世廟感動改戍遠方 隆慶四年詔旌之  
楊應旂華亭人父給事中允繩建言死於 朝旂刺血上  
書以幽卒後子舉人忠裕奏聞 萬曆二十三年與妻  
節婦袁氏同旌豎坊

浙江

崔永海塩人七歲喪父母韓氏從繼父謫海南後永徒步至瓊州求母時繼父已歿有司以配屬不許歸永復號泣請于朝許之舟行遇風永入水負母因感疾卒江西布政司以聞爲之祭葬仍給驛舟歸其母永往返數四廣海間人以崔孝子稱之

王紳補仲子性至孝痛父死節遂匍匐往雲南求遺骸旣至不可得乃即其處製神主號慟幾絕洪武末以文行薦授國子博士署繼志齋集二十卷

徐允讓山陰人元末兵亂允讓奉其父安避山谷間遇寇斫安傷頸讓大呼曰汝寧殺我勿殺吾父寇捨安殺讓

陳圭字錫玄台州黃巖人其父叔弘與其鄉人多讐圭常  
諫之後其讐人以賊告叔弘罪當死圭以狀告於通政  
司曰圭爲子不能諫其父以陷於不義得罪死此圭之  
不孝所致義當死乞罪圭原圭父使得自新誠不勝至  
願通政司以聞 上大喜曰不意今日乃復有孝子宜  
赦其死俟天下百官朝覲將播告之爲天下勸頌之刑  
部尚書開濟奏曰罪有常刑不宜屈法以開僥倖之路  
請論如法遂聽圭代父死而謫其父叔弘隸兵雲南聞  
者皆嘆圭之孝而惜其死

朱煦台州仙居人家世儒者母楊氏性嚴急煦事之盡恭  
順之道其伯父二人長季敬次季誠俱有令望嘗稱之

曰是姪猶吾子也其父季用由薦知福州府洪武十八年詔天下盡革今歲以上有司積歲官吏爲民害者季用視事僅五月以例起入京吏一以法論罪作城湏役嚴償重日用錢數十緡季用又病謂煦曰吾貲力豈足堪此吾旦夕死矣汝勿深憂但收吾骸歸葬耳煦惶懼不敢離左右復戒二弟熊正共守不敢少寐用由是不得死時役告枉者甚衆令益嚴告而謫隸兵雲南者二人被極刑者四人煦不顧死而陰與父僚友同役者謀曰吾無術脫吾父矣訴不訴皆死萬一吾父由訴獲免雖戮死萬萬無憾遂具辭通政司以聞上憫其情遂赦季用而復其官同時以煦告得免復官者十四人



皆拜煦父謝曰微君有孝子吾儕骨肉爲城下土矣

### 江西

陳仲賢武寧人母病割股以食母尋愈永樂初以事聞擢  
鴻臚署丞旌表其門

喻德昭臨川人洪武初父以戶無田移種鳳陽昭六歲育  
于所親年十四知之詣鳳陽尋弗得間關十年得見于  
漠中屯所而母已歿乃扶父歸病卒廬于墓哀慟過禮  
竟死墓傍

于顯偲新塗人六歲喪父踰年知求父像時拜且哭家貧  
事母能盡養及卒水漿不入口者數日比葬廬墓所虎  
馴其側人咸異之正德三年奉 詔旌表

傳興高安人性至孝父疾感夢百里外徒跣求醫得撫州  
絕嶺古井水調藥愈祖母曹氏孀居爲華林賊所掠欲  
殺之興渡水以救賊以巨撓壓之撓忽斷賊驚異釋之  
事聞 詔冠帶表其門

謝麟高安人應例監生正德初華林賊劫其家麟負母以  
避賊追尋益近家人速之走麟曰母在安可棄去旣而  
賊劫其母麟奮力奪之母獲免麟竟死於賊

唐孝子名治始江西之清江人僑居華亭之團江孝子起  
家功曹掾而實儒行孝謹守禮言動退讓人稱釀秀才  
父尚儒亦以德稱九十卒孝子苦塊未除而隣家火起  
早火勢昌熾孝子盡出資裝募人出其父柩而人心

駭亂無應者或挽孝子出曰父柩在此我死不出火息  
後所居歸然獨存孝子竟以薰灸伏棺死柩上皆成血  
掌痕事聞有司爲旌門曰孝子婦桂氏鞠四孤之屏等  
而食貧辟纊不忘訓迪

王溥貴溪人父名晉母葉氏生溥及弟漢二陳友諒據江  
西以漢二任宣慰溥守建昌至正辛丑漢二爲胡大海  
所獲太祖破江州溥亦自建昌來降拜中書右丞仍  
鎮建昌初溥父早世兄弟二人奉其母避兵貴溪之桃  
源山倉卒兵至母子相失溥日夜思母不置及洪武庚  
戌春正月忽夢母告以所在因命卜者筮之其繇辭曰  
非巖即穴朽骨是藏溥以情告于太祖惻然聽之

勅賜祭物以歸溥既至遂躬率士卒詣卬舊時避兵處  
伐木入山以物色之不得夜號者三日旣乃得其居人  
吳誨能告以賊兵逼時夫人病不能行即自投井中死  
矣溥披榛棘尋獲其井俄有一鼠自井中跳入溥懷旋  
復入井溥汲井索之遂得其骸仍具衣衾棺槨即其地  
葬之

羅瑋字宗器江西吉水人其先曰復仁 國初以弘文館  
學士從 太祖定天下後辭封爵 太祖嘉之賜歸田  
里其孫汝敬登永樂甲申進士歷官工部侍郎瑋即其  
孫也自幼友愛敬長尤善屬文以廕補太學生授四川  
布政司經歷屢遷常州府同知所至清慎有善政居母

喪廬墓螺子山下三年嘗隨一白犬主哀亦哀主息亦  
息山故無虎至是一虎渡江周旋坐次狎犬爲侶瑞偶  
以疾卧其杖竹倚壁生枝葉一白鴉爲鳩鳴久而不去  
當是時墳生芝荷華生於原徐太史舜和爲叙其事薦  
紳多爲詩以詠之後邵寶觀學江西爲立傳且述其忠  
信博雅云

山西

王約倚氏人父早喪母遭風疾不能動約朝夕扶持躬侍  
湯藥母亡廬墓不御酒肉正統初旌爲孝子

焦鑑大同人父喪廬墓成化六年旌爲孝子

張倫潞安府人居母喪廬墓致馬兔馴擾禾生聯穗之瑞

成化十一年旌之

楊智介休人母亡廬墓哀毀正統末旌爲孝子

山東

趙讓肥城人事母孝傭力以給母終廬墓有虎夜至聞讓  
悲泣輒避去有刼入廬讓告止有二升米爲母忌祭資  
賊感其孝以百錢遺之永樂中旌曰孝行

趙巖棠邑人母亡奉父甚謹家貧時借貸以供父艱苦不  
使父知父歿令母葬建祠墓側圖親容事之如生永樂  
中旌孝行

河南

何清許州人由貢授陝西環縣學訓導聞母喪遂徒步奔

歸襄事廬守墓側朝夕悲泣有責程應隨紫輿二巢累  
年不去成化初旌

呂仲和歸德衛人少喪父事母路氏至孝路因疾喪明百  
藥罔療仲和叩天泣禱禬之速愈後卒廬墓鳩雀馴集  
墓所正統初旌

楊敬歸德衛人父昱洪武間陣亡敬方十歲聞訃即哭隔  
每思求父遺骸不果乃取水冠葬于先塋之次事母文  
氏極孝謹聞戰陣事輒流涕不已時人以至孝稱之母  
卒哀毀踰禮方殮在堂隣不戒火將及柩敬仰天大哭  
俄及風息火鄉里異之受旌于愍舉人仕至知州

沈忠歸德衛人父疾籲天願以身代父卒母姚氏喪明忠

送死養生盡禮未幾姚卒廬墓年自封殖成化間旌忠  
後患難長子漢吮之忠卒季子瀚廬墓人謂一門三孝  
孫毓武陟人初登洪武丙子鄉試後代祖父行戌十有四  
年母喪廬墓躬負磚土築臺丈五許年幾百齡而卒  
王中登封人家業農母沒廬墓披麻食粥未常櫛髮易衣  
時旱後鑿井四丈餘不得泉中環井再拜籲天泉乃湧  
出鄉里謂誠孝所感洪武間表其門

周炳舞陽人事母焦氏至孝母病哀號籲天願以身代母  
思瘠肉炳四出求之弗得悲痛愈切晚忽有瘠人其室  
殺以啗母病遂愈洪武中旌

蔡毅中光州舉人萬曆二十六年三月巡按姚思仁奏其



孝行旌表

劉進光州人由貢中順天鄉試除大平府判連遭父母喪  
廬墓負土成墳致烏鵲鳴驚鄰集之異旌爲孝子陞太  
僕寺丞子廷璽舉人廷瓚進士官監察御史  
張登元河南新鄭縣生員有孝行隆慶五年旌

湖廣

趙說麻城人性孝友以詩書教授鄉里父母同日而死說  
號慟欲絕者累日負土成墳廬于墓側有白鵲馴棲之  
祥正統間旌表

許恩蘄水人年甫冠正德辛巳季冬夜鄰家火延恩舍恩  
思母江氏未出即反救母遂俱爲燼止存其手尚抱母

身邑人痛之

邵敏湘陰人事母孝母歿廬墓三年一夕有虎來墓所敏了無懼色忽數鹿來逐之去墓旁產芝數本人以爲孝感所致成化間旌其門

方觀武岡人性至孝年十四喪母哭泣踰禮及父卒廬墓三年孝事繼母卒遂終身廬墓景泰中旌

御顯芳辰州人正德七年鎮竿苗叛侵掠村寨衆皆逃避芳以母柩在堂固守勿去人怵以禍芳曰棄母而逃心實不忍况平生讀書所學何事苗至使芳爲鄉導芳不從遂遇害支解于母柩之前聞者憐之

楊成章道州人父泰任浙江長亭巡檢嫡母何氏無子泰

娶杭州丁氏生成章甫四歲泰卒於官丁氏留杭州何氏携成章扶襯歸成章長爲庠廩生初丁與子別剖銀錢爲記及何氏臨沒出銀錢付成章且告之故成章待服闋出遊尋母不獲而歸意猶懇切後因鄉人李紹義爲東陽典史偵知丁氏所在復往求之遂得母人以爲誠孝所感知州葉文浩以聞吏部侍郎唐龍上其事授國子學錄以旌其孝

福建

陳真展字剩夫泉州布衣家始微賤父爲打銀匠嘗携公執業主人密爲防公年十一語父曰何業而蒙盜賊之防乎勸父舍之間賣油者所得曰日餘油二壺喜曰此

足備養矣貨油至書舍聞講有子孝弟章大悅明日又聞弟子入則孝益喜入請其師曰小人願受學日以餘油爲贄師曰諾復告曰我本以賣油代父之業俚日養耳專一于學則累我父願得每旦一受講日仍賣油師從之逾年學大進成名儒今理學名臣錄稱其自拔流俗厭末作之蠹心而棄之正謂此也

### 廣東

郭張善潮陽人永樂丁酉夏六月由儒士爲翰林檢討先是善自陳少孤賴繼母撫成而教之今願出仕資養上嘉其孝令翰林試之頗有文學故授是官人咸謂不愧孝廉之選

林祖潮陽人早孤遇寇亂失母弟所在遍歷郡縣訪至梅州山中得見爲獠人所阻祖乃潛赴梅州訴之得還相離十有四年矣人以爲誠孝所感洪武中有司上其事賜衣九套鈔千貫官終河間府通判

何字新字子完廣東博羅人幼失父事母至孝鄉人稱之及母沒貧不能葬聞者爭贖比發引奠者七十餘筵遇積雨不止及輓車屈道隨在輒晴雨若爲之遷避者旣葬縛草廬墓側夜有虎蹲其門字新祝曰罪惡之人孤哀萬死盍蚤食我母徒相怖穴壁覘之二虎左右馴如也旣旦散去夜輒復至每浹旬則易二新者猶瓜代然字新忽得危疾鄉人舁歸治之其家在市虎亦尾之去

疾愈還墓則虎又來遂狎焉若素蒙者先是家蓄一黃犬三五日輒候墓所宇新欲有所需即書片紙繫其頸家人見之具脩繫使負還人稱皆孝感云鄉人爲白於藩司以聞詔旌其門後宇新舉鄉貢入南太學與蘇人錢士弘友善見其近體尚結衰絞帶牢不可解以示終身之喪

續文獻通考卷之七十二終